

**Pemecatan bukti kuatnya cengkaman PKR
Utusan Online
Januari 09, 2012**

KUALA LUMPUR 8 Jan. - Pemecatan Pengerusi Jawatankuasa Hal Ehwal Agama Islam, Adat-adat Melayu, Infrastruktur dan Kemudahan Awam Selangor, Datuk Dr. Hasan Ali sebagai ahli Pas berkuat-kuasa serta-merta hari ini membuktikan betapa kuatnya cengkaman Parti Keadilan Rakyat (PKR) terhadap Pas.

Ahli Parlimen Kulim Bandar Baharu, Datuk Zulkifli Noordin berkata, ia terbukti apabila Hasan dipecat selepas kurang 24 jam Timbalan Presiden PKR, Azmin Ali mendesak Pas berbuat demikian.

"Hasan juga dipecat tanpa langsung diberi peluang membela diri dan tidak dipanggil untuk mempertahankan diri. Islam sangatkah cara itu?" katanya menerusi laman sosial Tweeter hari ini.

Beliau berkata demikian sebagai reaksi kepada pemecatan Hasan sebagai ahli Pas berkuat kuasa serta-merta hasil mesyuarat yang diadakan Pas Pusat hari ini.

Dalam satu kenyataan, Pas menjelaskan, pemecatan itu dibuat berdasarkan Fasal 82(9) dan setelah mempertimbangkan segala pandangan yang diberikan oleh ahli-ahli jawatankuasa Pas Pusat.

Menurut kenyataan itu lagi, keputusan tersebut dibuat berdasarkan kepada tindakan-tindakan Hasan yang menyalahi dan merugikan kepentingan parti sebagaimana yang diperuntukkan dalam perlembagaan Pas.

Zulkifli menambah, Hasan dipecat kerana mempertikai akhlak Ketua Pembangkang, Datuk Seri Anwar Ibrahim serta hanya kerana kelantangannya mempertahankan Islam, membela akidah umat, memerangi murtad dan mencegah kemungkaran.

"Saya mahu bertanya kepada ahli-ahli Pas yang beria-ia sangat mahu mempertahankan Anwar esok, Hasan yang mempertikai akhlak Anwar telah dipecat daripada Pas, dan anda semua masih mahu mempertahankan Anwar lagi?" katanya.

Hakcipta Terpelihara © UTUSAN MELAYU (M) BERHAD

Source:

http://www.utusan.com.my/utusan/info.asp?y=2012&dt=0109&pub=Utusan_Malaysia&sec=Politik&pg=po_10.htm